

Pisortat ingerlatsinerat pillugu paasitinneqarsinnaatitaaneq pillugu Inatsisartut inatsissaata allanngortinneqarneranik Inatsisartut inatsissaattut siunnersuummut nassuiaatit. (Paasissutissat sulisorineqartut pillugit paasissutissanik paasitinneqarsinnaaneq).

Nassuiaatit nalinginnaasut:

Inatsisissatut siunnersuutip malitsigisaanik paasissutissat inuit ataasiakkaat pisortani atorfeqartitaanerannut tunngassuteqartut (sulisorineqartut pillugit paasissutissat aalajangersimasut) paasitinneqarsinnaatitaaneq pillugu inatsisip atuuffianut ilaatinneqassanngillat. Taamaalilluni paasissutissat taamaattut nalinginnaasumik paasissutissiissutigineqartassanngillat. Tamatumunnga peqatigitillugu nalinginnaasumik malittarineqartussa q taanna arlalitsigut saneqqunneqarsinnaasunnngortinneqarpoq, taamaalillutik atorfeqartup aqqa, ilinniagaqarnera, suliassai, akissarsiai sulihamullu atatillugu angalaneri inatsimmi malittarisassat nalinginnaasut malillugit suli paasissutissiissutigineqarsinnaassapput.

Aamma taamatut sulihamut atatillugu iliuuseqarfigineqarnerit, soorlu mianersoqquneqarnerit taakkunangaluunniit sakkortunerusumik iliuuseqarfigineqarnerit inatsimmi malittarisassat nalinginnaasut malillugit paasissutissiissutigineqarsinnaassapput, taamaattorli pisortatut atorfinni atorfillit kisiisa eqqarsaatigalugit, aamma atorfimmuut atatillugu iliuuseqarfigineqarnerit inaarutaasumik aalajangiivigineqarnerannit ukiut marluk taamaallaat tikillugit sivissusilimmi.

Tulliuttut tassaapput paasissutissat ullumikkut saqqummiunneqarsinnaasunut assersuutit, siunnersuulli malillugu siunissami paasissutissiissutigineqarsinnaajunnaartussat:

- paasissutissat atorfeqartup inuttut atugaanut tunngasut, taamaattorli ima innimiginannigitsigisut, allaat inatsit atuuttoq malillugu aatsaat pineqartunut ilaatinneqarsinnaassallutik assersuutigalugu imaattoqarpat:
 - adressit illersugaanngippata, telefonit normui isertuussassaannngippata, aappariissutsikkut pissutsit atuuttut il.il.
- pissutsit atorfeqartup atorfeqarneranut tunngasut, tassani suliassanik ingerlatsinerpiaq imaluunniit tamatumunnga atatillugu pissusilersortarneq, assersuutigalugu:
 - soraarsitaaneq qullersarisalluunniit iliuusaat sulihamut atuumassuteqanngitsut allat pillugit paasissutissat.

Tamakku saniatigut inatsisissatut siunnersuutip kingunerisaanik sulisunik naliliisarnerit aamma sulisunik ineriartortitsinermi oqaloqatigiinnerit ima qarniliorneri il.il. paasissutissiisinnaaneq qulaarneqarpoq, taamaalillutik paasissutissat taamaattut siuniussami pisortat ingerlatsineranni

aalajangiinernik paasitinneqarsinnaatitaaneq pillugu inatsimmi pineqartunut ilaajunnaarsinneqartussaallutik.

Inatsisissatut siunnersuutip matuma pisortat inatsisit tunngavigalugit ingerlatsineranni suliassat suliarineqartarnerat pillugu inatsimmi kapitali 4-mi peqataasup suliassamut tunngasunik ilisimasaqarnera pillugu malittarisassanik allanngortitsineq kingunerissanngilaa.

Siunnersuutip akuersissutigineqarnerata aningaasatigut allaffissornikkulluunniit kinguneqarnissaa naatsorsuutigineqanngilaq.

Aalajangersakkanut ataasiakkaanut nassuiaatit:

§ 1-imut

Imm. 1-imut

Aalajangersakkap taassuma aalajangersakkami atuuttumi imm. 1-imi oqaaseqatigiit siulliit aamma imm. 2 assigai.

Imm. 2-mut

Aalajangersakkami oqaaseqatigiit siulliit aalajangersakkami atuuttumi imm. 1-imi oqaaseqatigiit aappaat assigat. Aalajangersakkap atuuffinik allanngortitsinissaq siunertarineqanngilaq.

Aalajangersakkami oqaaseqatigiit aappaat malillugu inuit atasiakkaat pisortani atorfeqartitaanerini (sulisorisat pillugit paasissutissat inunnut ataasiakkaanut tunngassuteqartut) paasissutissanut allanut inatsit aallaavittut atuutissanngilaq, allattuisussaataaneq pillugu § 6-imi aalajangersagaq eqqaassanngikkaanni.

Tassa taamaalillutik allattuisussaataaneq pillugu malittarisassat sulisorisat pillugit paasissutissaatigineqartunut atuutissapput, soorluttaaq § 4, imm. 2 naapertorlugu atorfeqartut namminer-mut tunngasunik paasitinneqarsinnaatitaanerat siunnersuutikkut allanngortinneqassanngitsoq. Aammattaaq atorfeqartup soorlu sulisutut qanoq iliuuseqarfigineqarmimi suliassat suliarineqartarnerat pillugu inatsimmi kapitali 4-imi malittarisassat naapertorlugit suliaq pillugu paasitinneqarsinnaatitaanera siunnersuutikkut allanngortinneqanngilaq.

Aalajangersakkap atuuffigajuttagassaa tassaassaaq "sulisorisat pillugit paasissutissat nalinginnaasut", tassa imaappoq paasissutissat sulisup sulilerneratigut nalinginnaasumik pilersinneqartartut, assersuutigalugu tunngaviusumik akissarsiat, sulisut akissarsiaat tapisiallu allat, feriarsimanermut takussutissat, napparsimanermut tunngasut, suliamut atillugu angalanerit, sulisunik

ineriartortitsinermi oqaloqatigiinnerit imaqarniliorneri il.il. paasissutissanik allanik piffissap ingerlanerani ilaartorneqartartut.

Aamma atukkat pissutsillu immikkut ittut pillugit paasissutissat, soorlu suliunnaarsinneqarallarneq, soraarsitaaneq imaluunniit sulisup suliaminut atatillugu iliuuseqarfigineqarnikkut malersorneqarnera aalajangersakkami tassani pineqartunut ilaatinneqarput.

Aammattaaq atorfinitsitsinernut atorfinnilu qaffatsinneqarnernut atuuttut assigalugit suliassat allakkianik paasissutissanillu sunik imaqarnerat apeqqutaanngilaq. Taamaalillutik suliassani allakkiat paasissutissallu tamarmik aalajangersakkami pineqartunut ilaatinneqassapput, taamaattumillu paasissutissiissutigineqarsinnaasunut aallaavittut ilaatinneqassanatik.

Aalajangersakkap atuuffiata avataaniipput paasissutissat sulisoqarnermut tunngasut, inunnut ataasiakkaanut tunngassuteqanngitsut (sulisorisat pillugit paasissutissat nalinginnaasut). Tamakku tassaasinnaapput paasissutissat sulisut kattuffinut akissarsiat pillugit isumaqatigiinniarnernut tunngasut imaluunniit paasissutissat oqartussanut allanut paarlaateqatigiittarnissanut il.il. tunngassuteqartut. Suliassat taamaattut inatsimmi §§ 4-14 malittarisassat nalinginnaasut malillugit paasissutissiissutigineqartartussaassapput.

Imaattoqarsinnaavoq sulisorisat pillugit paasissutissani aalajangersimasuni allakkiat sulisorisat pillugit paasissutissani nalinginnaasunut ilanngunneqartut. Assersuutigalugu paasissutissani sulisumut ataatsimut tunngassuteqartuni allakkiaq sulisoqarneq ataatsimut isigalugu paasissutissani tunuliaqutassatut uppersaasiussatulluunniit ilanngunneqarsinnaavoq. Aalajangersagaq siunnersuutigineqartoq suliak kingulliit taaneqartut pillugit paasitinneqarnissamik qinnuteqaateqarnermi atornerqarsinnaasussaasannngilaq, tak. qulaani taaneqartut. Kisianni pisuni taamaattuni - aalajangersakkami mianerisariaqartutut tunuliaqutaasut tunngavigalugit - § 13, imm. 1 nr. 6 malillugu suliak taamaattuni paasissutissiissutigineqarnissaat qinnuteqaatigineqarpat nalinginnaasumik itigartitsissutigineqarsinnaavoq.

Aammattaaq imaassinnaavoq sulisorisat pillugit paasissutissat nalinginnaasut sulisunut ataasiakkaanut tunngassuteqartunik imm. 2-mi oqaaseqatigiit aappaanni taaneqanngitsunik ilaqartut. Tamakku assersuutigalugu tassaasinnaapput siunnersortit nalunaarusiaat, oqartussaqaarfimmi pineqartuni sulisoqarnermut ataatsimoortumik tunngassuteqartut, atorfeqartulli ataasiakkaat suliakinnik ingerlatsinerannik naliliinernik il.il. imaqartut. Aamma paasissutissani taamaattuni mianerisassat aalajangersakkatut siunnersuutigineqartumiittut tunngavigalugit paasissutissat taakku pillugit paasitinneqarnissamik qinnuteqaatit nalinginnaasumik itigartinneqarsinnaapput, tak. § 13, imm. 1 nr. 6.

§ 13, imm. 1 nr. 6 pillugu oqaatigineqartut paasissutissanut imm. 3-imi pineqartunut, kiisalu

sulisorisat pillugit paasissutissat aalajangersimasutulli takuneqaqqusaanngissinnaanngitsunut atuutinngillat, tak. tulliuttut.

Imm. 3-mut

1. Aalajangersakkap taassuma sulisorisat pillugit paasissutissani aalajangersimasuni paasissutissat ilaasa imm. 2-mi oqaaseqatigiit aappaanni taaneqarsimasut paasitinneqarsinnaatitaaneq pillugu inatsimmi pineqartunut ilaatinneqanerat nassataraa.

Tassa imaappoq paasissutissat taakku paasissutissiissutigineqarsinnaanerit pillugu apeqqutit inatsimmi malittarisassat nalinginnaasut tunngavigalugit aalajangiivigineqartassat. Taamaatumik paasissutissat taakku pisut qanoq ittuunerat apeqqutaatillugu pineqartunut ilaatinneqannigitsoorsinnaapput, inatsimmi aalajangersakkat sinnerisa nassatarisaannik. Tamanna assersuutigalugu atuuppoq taamaaliortoqarneratigut sulisup akiniarlugu naqisimaniarneqarsinnaanera, ajoquserneqarsinnaanera taakkuluunniit assigissaannik pisoqarsinnaanera erseqqissumik ilimaqineqarpat, tak. § 13, imm. 1 nr. 3.

Sulisorisat pillugit paasissutissani siuliini taaneqartunik paasissutissanik imaqartuni allakkiat aalajangersakkami taaneqanngitsunik paasissutissanik imaqakkajuttassapput taamaammallu paasissutissinneqartussaanerup ataaniissanatik. Taamatut pisoqartillugu imaqarniliuisoqartariaqarpoq. Tamanna pisinnaavoq paasissutissat paasissutissiissutiginnigitsoorneqarsinnaanngitsut assilillugit allakkiamut allamut nuunnerisigut, taassumalu tunniunneqarneratigut, imaluunniit paasissutissat paasissutissiissutigineqartussanngitsut asserneqarnerisigut, taamaalillutik paasissutissat taakku allakkiami tunniunneqartumi takuneqarsinnaajunnaarsillugit.

Inatsimmi § 4, imm. 1-imi oqaaseqatigiit aappaanni annertunerusumik paasissutissiisinnaaneq malillugu paasissutissat imm. 3-mi pineqartunut ilaatinneqanngitsut aamma paasissutissiissutigineqarsinnaapput, taamaaliornissaq nipangiussimasussaataitanerup ajornartinngippagu. Taama pisoqartillugu aalajangersaganngortussat siunnersuutigineqartoq atorlugu illersorneqartussat kiisalu illuatungaani soqutigisat paasissutissinneqarnissamik qinnuteqarnermut pissutaasut imminnut sanilliullugit oqimaalutarneqartariaqarput. Tamatumunnga atatillugu naatsorsuutigisariaqarpoq assersuutigalugu tusagassiortut pisortat pillugit tusagassiorniartillutik misissuinerminni paasitinneqarnissamik qinnuteqaataasa suliarineqarnerini tusagassiuutit apeqqutinik tamanut soqutiginaateqarsinnaasunik qulaajaanissaannut periarfissat immikkut isiginiarneqartassasut.

2. Aalajangersagaq taanna malillugu siullermik paasissutissat "nalinginnaanerusut" arlallit inatsimmi pineqartunut ilaatinneqarput. Tassani pineqartut tassaapput atorfeqartup aqqa, atorfia, ilinniagaqarnera, suliarisartagai, akissarsiaanut tunngasut suliamullu atatillugu angalaneri pillugit paasissutissat.

Atorfiit suliarisartakkallu pillugit paasissutissanik oqarnermi oqartussami paasitinneqarnissamik qinnuteqaateqarfiusumi atorfik suliaassallu pingaartumik eqqarsaatigineqarput, matumani oqartussami tassani siusinnerusukkut atorfigisimasai suliaassarisimasaalu ilanngullugit eqqarsaatigalugit.

Qulaani taaneqartutut suliat pisortani atorfinitsitsinernut atorfinnilu qaffatsitsinernut tunngasut inatsimmi ilaatinneqanngillat, matumani pisortani namminersortuniluunniit siusinnerusukkut atorfigisimasat suliaassarisimasallu pillugit paasissutissat, assersuutigalugu atorfeqartup atorfinmini qaffakkiartuaarsimaneranik qulaajaasinnaasut ilanngullugit eqqarsaatigalugit. Kisianni sulisorisat pillugit paasissutissani nalinginnaasuni tamakku pillugit paasissutissaqarpat paasissutissat taakku inatsimmi pineqartunut aamma ilaatinneqassapput. Tamanna pisortani saniatigut suliaqarneq pillugu paasissutissanut aamma atuuppoq, assersuutigalugu aalajangiiniartartoqatigiinni, siunnersuisoqatigiinni, ataatsimiititaliarsuarni il.il. ilaasortaaneq eqqarsaatigalugu.

Atorfeqartup ilinniagaqarnera pillugu paasissutissanik paasitinneqarsinnaatitaanermi atorfinitsinneqarneq sioqqullugu ilinniagaqarsimaneq pingaartumik eqqarsaatigineqarpoq. Aammattaaq ilaatigut ilinniaqqissimasinnaanermut paasissutissat paasissutissiissutigineqarsinnaapput, matumani pikkorissartitsinerni il.il. peqataasimanerit ilanngullugit eqqarsaatigalugit. Soraarummeernermi karakterit il.il. pillugit paasissutissat (§ 12, imm. 1 nr. 1 malillugu ilaatinneqanngitsoorsinnaasut) pineqartunut ilaatinneqanngillat.

Aammattaaq paasissutissat akissarsianut tunngasut inatsimmi pineqartunut ilaatinneqarput. Tamanna tunngaviumik akissarsiaannarnut il.il. atuutinngilaq, aammali qaangiuttoornersianut, pikkorissarnermut immikkullu suliaqarnermut tapisianut, tapisianut immikkut ittunut, soraarnermut atatillugu ajunngitsorsianut soraarnerussutisianullu il.il. atuulluni. Tamatumunnga tapertaliullugu suliamut atatillugu angalanerit pillugit paasissutissat inatsimmi malittarisassat nalinginnaasut malillugit paasissutissiissutigineqarsinnaapput, matumani ilaatigut angalanermi siumoorutit naatsorsuusiorneqartarneri ilanngullugit eqqarsaatigalugit. Kisianni assersuutigalugu tapisianik tunineqarneq imaluunniit soraarnermut atatillugu ajunngitsorsiassat pillugit isumaqatigiissuteqarnerni tunngaviusut erseqqinnerusut pineqartunut ilaatinneqanngillat.

3. Aappasaanik suliamut atatillugu iliuuseqarfigineqarnerit pillugit paasissutissat ilaat inatsimmi pineqartunut ilaatinneqarput. Kisianni pisortatut atorfinniinnaq atorfeqartunut tamanna atuuppoq, piumasaqaataallunilu pissutsit iliuuseqarfigineqarsimanermut pissutaasut atorfinni tassani pisimasuussasut. Taamaalillutik pisortatut atorfinni atorfinitsinneqarneq sioqqullugu atorfinmut atatillugu iliuuseqarfigineqarsimanerit il.il. pineqartunut ilaatinneqanngillat.

Namminersornerullutik Oqartussani kommuninilu pisortat ingerlatsiviini nalinginnaasuni atorfeqartut eqqarsaatigalugit allaffinni pisortat taakkunanngalu qaffasinnerusunik atorfillit pineqar-

tussaapput. Assersuutigalugu taakku tassaasinnaapput atorfiup atorunnaarsinneqarnerata kingorna allamik atorfeqartinneqarallartut, immikkoortortaqaqarfinni pisortat, direktørit kommunillu direktørii. Kisianni fuldmægtigit allaffinnilu sulisorineqartut pineqartunut ilaatinneqartussaangillat.

Kisianni oqaatigineqartutigit suut tamaasa tamakkerlugit ilanngunneq ajornarput. Pisuni taaneqartunit allaanerusuni atorfinni ilaatigit siulersuinikkut piginnaatitaaffiit, akissarsiat aqutsisoqarfimmilu atorfiit qaffakkiartuaartut assersuutini taaneqarsimasunut sanilliunneqarsinnaasut ilaanni sorlarni atorfeqarneq pingaartillugu isiginiartariaqarpoq. Akissarsianut tunngasut eqqarsaatigalugit oqaatigineqassaaq pissutsit ullumikkutut itsillugit pineqartut tassaasussaammata atorfeqartut akissaateqarfimmi 36-mi tassanngaluunniit qaffasinnerusumi taakkuluunniit assigisaanni inissisimasut.

Siunnersuut naapertorlugu inuit taaneqartut eqqarsaatigalugit paasissutissat suliamut atatillugu iliuuseqarfigineqarnernut tunngasut suugaluartulluunniit inatsimmi pineqartunut ilaatinneqangillat. Tassani pineqartut tassaassapput mianersoqqusinerit iliuuserisalluunniit taakkunannga sakkortunerusut. Tjenestemandit eqqarsaatigalugit assersuutigalugu tamakku tassaasinnaapput assuarineqarneq, pillaammik akiliisinneqarneq, atorfimmut appasinnerusumut nuutsinneqarneq soraarsitaanerluunniit, tak. Kalaallit Nunaanni Namminersornerullutik Oqartussani kommuninilu tjenestemandit pillugit Inatsisartut inatsisaanni § 27. Atorfeqartut allat eqqarsaatigalugit assersuutigalugu iliuuserineqartut tassaasinnaapput suliarineqartartut allangortinneqarnerat, soraarsitaaneq imaluunniit suliami iliuusissaanngitsumik iliuuseqarsimaneq pissutigalugu suliffimmit peersitaaneq.

Taaneqartunit annikinnerusunik iliuuseqarnerit pillugit paasissutissat inatsimmi pineqartunut ilaatinneqangillat, atorfeqartoq kina pineqarnersoq apeqquataatinnagu. Tamakku assersuutigalugu tassaasinnaapput "suliamut atatillugu uparuaanerit", matumani pissutsit oqartussap isorisarialittut isigisai, kisianni suliamut atatillugu pisortatigoortumik iliuuseqarfigineqarnissaannut naammattumik tunngavissaqanngitsut pissutigalugit inassuteqaatit eqqaasitsinerillu ilanngullugit eqqarsaatigalugit.

Paasissutissat suliamut atatillugu iliuuserineqartumut tunngasut kisimik - tassalu oqartussat atorfinitsitsisuusut allakkiaat suliassani inaarutaasumik aalajangiinernik imaqartut - inatsimmi pineqartunut ilaatinneqarput. Suliami allakkiaat paasissutissallu allat (§ 13, imm. 1 nr. 3 malillugu ilaatinneqanngitsoorsinnaagajuttooreersut) pineqartunut ilaatinneqangillat. Assersuutigalugu tamanna suliamut atatillugu killisiuinerup imaqarniliorneqarnerata killisiuinermillu ingerlatsisup nalunaarusiaata assilineqarnerinut atuuppoq. Suliamut atatillugu iliuuseqarnermik aallartitsinissamut tunngavissaqannginneranik aalajangiinerit aamma pineqartunut ilaatinneqangillat. Pingaartumilli suliassani suliamut atatillugu iliuuseqarnissamik ingerlatsisoqarnera nalinginnaa-

sumik ilisimaneqartillugu aalajangiinerup taamaattup tamanut saqqummiunneqarnissaa atorfeqartup nammineq soqutigigajuttussaavaa.

Suliamut atatillugu siusinnerusukkut iliuuserineqarsimasut pillugit paasissutissat aalajangiiner-mi ilanngunneqarpata taakku inatsimmi pineqartunut taamaallaat ilaatinneqassapput taakku ilaatinneqarnissaannut piunasaqaatit aatsaat eqqortinneqarsimappata. Assersuutigalugu suliamut atatillugu iliuuserisassaangitsumik iliuuseqarsimaneq pineqartup pisortatut atorfinitsinneqarnera sioqqullugu iliuuserineqarsimasoq pillugu paasissutissaq aalajangiiner-mi ilanngullugu taaneqartoq inatsimmi pineqartunut ilaatinneqartussaassanngilaq.

Pisuni qaqutigoortuussagunartuni atorfimmuut atatillugu iliuuseqarnissamik pisortatigoortumik aalajangiiffiunngitsuni, taamaattorli oqartussap inaarutaasumik allagaani takuneqarsinnaalluni taaneqartutut iliuuseqarnissamut tunngavissaqartussaasoq, taava allagaq taanna inatsimmi pineqartunut ilaatinneqartussaavoq. Assersuutigalugu tassaasinnaavoq suliassami annertuneru-sumik iliuuseqartoqaqqissanngitsoq - atorfeqartup nammineq piunassutsini tunngavigalugu suliassanik allanik suliqaalereersimanera pissutigalugu - kisiannili suliamut atatillugu iliutsitit suliamut allamut nuutsitsinissamut tunngavissaqartussaasoq.

Aalajangiiner-mi il.il. paasissutissat suliamut atatillugu iliuuserineqartumut annertuneru-sumik attuumassuteqanngitsut aalajangersakkatut siunnersuutigineqartumi imm. 2-mi oqaaseqatigiit aappaani aamma imm. 3-mi oqaaseqatigiinni siullerni malittarisassat nalinginnaasut naaportorlugit naliliiffigineqartassapput. Tamatuma kinguneraa assersuutigalugu adressip namminerisap aalajangiiner-mi taaneqarsimasinnaasut inatsimmi pineqartunut ilaatinneqannginnera.

Aalajangiineq allaffissornikkut oqartussamut qulliuneru-sumut naammagittaalliutigineqarsimappat naammagittaalliutigineqarnissaaluunniit naatsorsuutigineqarpat aalajangiineq inatsimmi pineqartunut aatsaat ilaatinneqarsinnaalissaaq naammagittaalliutigineqartoq pillugu aamma aalajangiisoqareerpat. Kisianni allaffissorner-mi aqutsinikkut aalajangiinerup assersuutigalugu kommunitimik nakkutilliisoqarfimmuut, eqqartuussivimmuut Inatsisartulluunniit Ombudsmandian-nut suliassanngortinneqarsimanera tassani sunniuteqartussaannngilaq.

Inaarutaasumik aalajangiisoqareerpat il.il. aalajangiineq taanna inatsimmi pineqartunut ukiuni marlunni ilaatinneqartussanngussaaq. Piffissap tamatuma kingorna aalajangiineq inatsimmi pineqartunut ilaatinneqarunnaassaaq. Taamaattorli aalajangiineq siusinnerusukkut tamanut saqqummiunneqarsimappat pissutsit qanoq ittuunerat aalajangiisuutillugu annertuneru-sumik paasissutissiisinaaneq tunngavigalugu pissusissamisoortussaavoq paasitinneqarnissamik qinnutteqaatit piffissap taaneqartup naanerata kingorna saqqummiunneqartut akuersaarneqartar-nissaat.

Ukiut marluk killissaliunneqartutut taaneqartut atorfinitsinneqarneq pillugu suliasani assersuutigalugu siusinnerusukkut mianersoqqussutaasimasup kingusinnerusukkut suliamut atatillugu iliuserisassaannngitsunik iliuseqarsimanernut qanoq pingaaruteqartinneqarnissaannut sunniuteqanngilaq.

4. Imm. 2-mi oqaaseqaatigiit aappaanni aalajangersakkatut siunnersuutip, tak. imm. 3, nassataraa sulisorisat pillugit paasissutissani paasissutissat arlallit ullumikkut paasissutissiissutigineqarsinnaasut paasitinneqarsinnaatitaaneq pillugu inatsimmi pineqartunut ilaatinneqarunnaarnerat.

Assersuutigalugu tassani pineqarput adressit illersugaanngitsut, telefonit normui isertuussasaanngitsut aappariissutsikkut inissisimaneq pillugu paasissutissat sulisullu inuttut atugaat pillugit allallu paasissutissat taakku assigisaat.

Sulisut sulinerminni atugaannut tunngassuteqartut eqqarsaatigalugit aalajangersakkatut siunnersuutip nassataraa paasissutissat taamaattut - suliasanik ingerlatsinerpiamut tunngassuteqarunik imaluunniit suliat ingerlanneqarnerannut atatillugu qanoq pissusilersornermut tunngassuteqarunik - paasitinneqarsinnaatitaaneq pillugu inatsit malillugu pineqartunut aallaavittut ilaatinneqartussaannginnerat. Taakku taamaallaat paasissutissiissutigineqarsinnaassapput imm. 3-mi aalajangersakkami malittarisassat malillugit. Tamatuma ilaatigut kinguneraa pissutsit soraarsitsinermut il.il. tunngaviusut pillugit paasissutissat suliamut atatillugu iliuseqarfigineqarnerup tunngaviginngisaasa inatsimmi pineqartunut ilaatinneqannginnerat.

Tamatumunnga peqatigitillugu erseqqissarneqarpoq assersuutigalugu sulisunik naliliisarnerit aamma sulisunik ineriartortitsinermi oqaloqatigiinnerit imaqarniliorneri § 13, imm. 1-imi nr. 6 malillugu ullumikkut isertuunneqarsinnaareersut paasissutissiissutigineqarsinnaasunut ilaatinneqarunnaarmata.

Imm. 4-mut

Paasinarsisinnaavoq sulisorineqartut pillugit paasissutissani aalajangersimasuni allanik paasissutissaqartoq imm. 3-mi taaneqarsimanngitsunik paasissutissiissutigineqarsinnaasariaqartunik.

Tamanna tunngavigalugu siunnersuutigineqarpoq Naalackersuisut nalunaarummik aalajangersaanermikkut imm. 3-mi aalajangersakkat atuuffisaannik annertusisitsinnaassasut. Tamatumani piumasarineqarpoq tassani paasissutissat pineqartut tassaassasut qanoq ittuussusertik tunngavigalugu innuttaasunut soqutiginaateqarsinnaasut, paasissutissallu paasissutissiissutigineqarsinnaalernerat sulisut mianerisariaqarnerannut oqartussallu sulisoqarnermikkut soqutigisaannut annertuumik assortuuttuussanngitsoq.

Aalajangersagaq inatsisitigut tunngavissaliinngilaq paasissutissat qulaani isummerfigineqarsimasut inatsimmi pineqartunut ilaatinneqarnissaannik aalajangersaanissamut. Assersuutigalugu aalajangiisoqarsinnaanngilaq sulinermut atatillugu sulisunut atorfinni appasinnerusumi atorfeqartunut iliuuserineqartut imaluunniit tapisiaqalersitsinermut il.il. atatillugu tunngavigineqartut pillugit paasissutissat erseqqinnerusut inatsimmi pineqartunut ilaatinneqassasut. Aalajangersakkakkulli paasissutissat inatsisissatut siunnersuutip matuma suliarineqarnerani naammattumik eqqumaffigineqarsimannigitsutut malunniukkumaartussat eqqarsaatigineqarput.

Piginnaatitsinermik taassuminnga atuineq pisinnaavoq assersuutigalugu tusagassiortut Naalakkersuisunut malugeqquppassuk paasissutissat taamaattut paasissutissiissutigineqarnissaat pisariqartinneqartoq. Tamatumani piumasarineqarpoq piginnaatitsissutip taassuma atorneqalinnginnerani Naalakkersuisut apeqqut taanna pillugu oqartussanik suliniaqatigiiffinnillu susasaqartunik oqaloqateqartassasut, aalajangiiniarnermi pitsaanerpaanik tunngavissaqarsinnaajumallutik.

Nr. 2-mut:

Nalinginnaasumik naatsorsuutigineqartarpoq atorfeqartoq, sulisorineqartut pillugit paasissutissat qinnutigineqartut inuttaat pineqartoq, suliaq pillugu paasisaqarnermut attuumassuteqanngitsoq. Taamaammat suliasat suliarineqartarnerat pillugu inatsit naapertorlugu atorfeqartinneqartup pineqartup tusarniarneqarnissaanut, imaluunniit sulisorisat pillugit paasissutissat tamakkerlugit ilaannakorlugilluunniit tunniunneqarsimanerannut tunngasunik tunngavilersuiffiginissaanut pisussaaffeqartoqanngilaq. Taamaattorli ingerlatsinermi ileqqorissaarnerup malitsigisaanik sulisup pineqartup sulisutut imminut paasissutissaatigineqartut takuneqarnissaannik qinnuteqartoqarsimaneranik ilisimatinneqarnissaa naatsorsuutigineqartariaqarpoq taamaalilluni pineqartoq taanna isummaminik oqaasissaminilluunniit saqqummiussisinnaaniassammat suliaq pillugu paasissutissat takujumaneqarnerata isummerfigineqarnissaa sioqqullugu.

§ 16, imm. 3-itut siunnersuutigineqartup malitsigisaanik sulisup, sulisutut imminut paasissutissaatigineqartunik takunnikkumasoaqarsimaneranik oqartussaasunit ilisimatinneqarnissaa inatsimmi immi erseqqissumik aalajangersarneqartussanngorpoq. Taamaaliornermi oqartussaasut oqaatigissavaat kina qinnuteqarnerasoq. Atorfeqartinneqartup ilisimatinneqarnera pissaaq oqartussaasut paasissutissinneqarumanermik qinnummik tigusaqareerneranniit piaarnerpaamik. Ilisimatitsinikkut siunertarineqarpoq soorlu oqartussaasut paasissutissinneqarumaneq pillugu aalajangiiniarnerannik atugassanik atorfeqartinneqartup oqaaseqaateqarnissaminik periarfissinneqarnissaa. Suliaq pillugu piaarnerpaamik aalajangiisinaajumallutik oqartussaasut atorfeqartinneqartup isummaminik saqqummiussinissaanut sivikinnerusumik piffissaliisariaqarput. Tamatumani oqaatigineqassaaq pisortat ingerlatsineranni aalajangiinernik paasitinneqarsinnaati-taaneq pillugu inatsimmi § 16, imm. 2 naapertorlugu oqartussaasut suliaq pillugu paasitinneqarnissamik qinnuteqarfigineqarnerminniit ullut qulit ingerlanerini aalajangiisimannigikkunik

tamatumunnga pissutaasunik qinnuteqartumut nalunaaruteqartussaammata kiisalu aalajangiinerup qaqugukkut ilimagineqarsinnaaneramik ilisimatitsissallutik. Inatsisissatut siunnersuutigineqartoq naapertorlugu oqartussaasut suliaq pillugu aalajangiisimagunik atorfeqartinneqartoq sulisutut tassunga paasisutissaatigineqartut suut tunniunneqarsimanerannik aamma nalunaarfigissavaat. Paasisaqarumaneq itigartilluinnarneqarsimappat atorfeqartinneqartoq aamma tamatuminnga ilisimatinneqassaaq. Atorfeqartinneqartup imminut sulisutut pilluni paasisutissaatigineqartunik takunnikkumasoqarnera pissutigalugu suliamut ilanngunneqarnissaa aalajangersakkap kingunerissanngilaa. Tassa tamatumuunakkut inatsisit atuuttut malinneqaannarnissaat naatsorsuutigineqarpoq.

§ 2-mut

Piffissamit atortuulermimminit inatsit atorneqarsinnaalissaaq, allakkiat il.il. paasisutissiissutigeqqullugit qinnuteqaatigineqartut ingerlatsinermi oqartussamit pineqartumit qanga allanneqarsimanerat qaqugukkulluunniit pissarsiarineqarsimanerat apeqqutaatinnagu.

Inatsisip atortuulersinneqarfia sioqqullugu sulisoq pillugu suliassami paasitinneqarnissamik qinnuteqaat saqqummiunneqarsimappat, inatsisillu atortuulersinneqarfia sioqqullugu tamanna pillugu aalajangiisoqarsimappat paasitinneqarnissamik apeqqut pineqartoq malittarisassat manna tikillugu atuuttut tunngavigalugit naliliiffigineqartassaaq.

Pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaata allanngortinneqarneranik Inatsisartut inatsisissaattut siunnersuummut ilanngusaaq. (Sulisorineqartut pillugit paasissutissanik paasitinneqarsinnaaneq)

Ilanngussami matumani aalajangersakkap atuuttup (naqinnerit mikinerusut atorlugit naqinneqartup) inatsisissatut siunnersuummit attorneqartup oqaasertalerneqarnera ilanngunneqarpoq.

§ 1.

Pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaanni nr. 9-mi 13. juni 1994-imeersumi makku allannguutiginitinneqassapput:

1. § 2 ima oqaasertalerneqassaaq:

“§ 2. Inatsit suliassanut pinerluttulerinermut attuumassuteqartunut atuutinngilaq. Suliassat inatsisiliornermut tunngasut, matumani aningaasaliissutissanut inatsisit ilanngullugit eqqarsaatigalugit, inatsisissatut siunnersuutitut Inatsisartunut saqqummiunneqarsimagunik inatsimmi pineqartunut aatsaat ilaatinneqarsinnaapput.

Imm. 2. Aammattaaq suliassanut pisortani sulisunik atorfinitsinernut imaluunniit pisortani atorfinnut qaffasinnerusunut qaffatsinneqarnermut tunngasunut inatsit atuutinngilaq, § 6-imi aalajangersagaq eqqaassanngikkaanni. Tamanna suliassani pissutsinut inuit ataasiakkaat pisortani atorfeqarnerannut tunngassuteqartunut aamma atuuppoq, taamaattorli imm. 3 § 4, imm. 2 takuuk.

Imm. 3. Suliassani imm. 2-mi oqaaseqatigiit aappaanni taaneqartuni atorfeqartup aqqa, atorfia, ilinniagaqarnera, suliassai, akissarsiai sulihamullu atatillugu angalaneri pillugit paasissutissanut inatsit atuuppoq. Aammattaaq pisortatut atorfinni atorfinnitsinneqartut eqqarsaatigalugit inatsit sulihamut atatillugu mianersoqqussutit iliuuserisallu taakkunannga sakkortunerusut pillugit paasissutissanut atuuppoq. Taamaattorli tamakku pillugit inaarutaasumik aalajangiinermi ukiuni marlunni taamaallaat tamanna atuuppoq.

Imm. 4. Suliassani imm. 2-mi oqaaseqatigiit aappaanni pineqartunut ilaatinneqartuni paasissutissanut imm. 3-mi taaneqarsimasunit allaanerusunut inatsit aamma atuutissasoq Naalakkersuisut aalajangersinnaavaat.”

§ 2. Inatsit pinerluttulerinermut attuumassuteqartunut atuutinngilaq. Pisortat suliffeqarfiutaanni atorfinitsinneqarnermut atorfimmiluunniit qaffatsinneqarnermut tunngasunut § 6-imi aalajangersakkat taamaallaat atuupput.

Imm. 2. Suliassat inatsisiliornermut tunngasut, matumani aningaasaliissutissanut inatsisit ilanngullugit, inatsisissatut siunnersuutitut Inatsisartunut saqqummiunneqarsimagunik inatsimmi aatsaat ilaatinneqarsinnaapput.

2. § 16-imi imm. 2.-p kingorna immikkoortutut nutaatut ikkunneqassaaq:

Imm. 3. Suliat § 2, imm. 2, oqaaseqatigiit aappaanni taaneqartut takujumaneqarpata oqartussaasut piaarnerpaamik atorfeqartumut tamanna pillugu ilisimatitsissapput kina taama qinnuteqarsimansoq ilanngullugu taallugu. Paasissutissat takuneqarsinnaanerannik aalajangiisoqarpat oqartussaasut paasissutissat suut tunniunneqarsimanerinek atorfeqartumut nalunaaruteqassapput”.

Imm. 3 matuma kingorna imm. 4-rngorpoq.

§ 16. Oqartussaasut pineqartut qinnuteqaatip akuerineqarsinnaanera piaarnerpaamik isummerfigissavaat; kiisalu qinnuteqartup paasissutissanik paasissutissat sumiiffigisaanni misissuinermigut imaluuniit assilinerinik nuutsinngarnerinilluuniit tunineqarnermigut ilisimannilernissaa aamma isummerfigissallugu.

Imm. 2. Suliaq pillugu paasitinneqarnissamik qinnuteqaat oqartussaasunit pigineqartunit tiguneqarnerminiit ullut qulit ingerlanerini akuerineqanngippat itigartineqanngippalluuniit, oqartussaasut qinnuteqartoq tamatumunnga pissutaasumik ilisimatissavaat kiisalu aalajangiinerup qaqugukkut ilimagineqarsinnaaneramik ilisimatissallugu.

Imm. 3. Assilisat nuutsitalluuniit akilerneqarnissaat pillugu naalackersuisut malittarisassiorsinnaapput.

§ 2.

Inatsisartut inatsisaat 1. juli 1999 atortuulerpoq.